

Embargo: Hanya boleh diterbitkan atau disebarikan mulai jam 1200, Rabu, 31 Julai 2024



KEMENTERIAN EKONOMI
JABATAN PERANGKAAN MALAYSIA

KENYATAAN MEDIA

ANGGARAN PENDUDUK SEMASA, MALAYSIA, 2024

PENDUDUK MALAYSIA MELEBIHI 34.1 JUTA PADA TAHUN 2024 DENGAN PENINGKATAN UMUR PENENGAH KEPADA 30.9 TAHUN

PUTRAJAYA, 31 Julai 2024 – Jabatan Perangkaan Malaysia (DOSM) telah mengeluarkan statistik berkaitan **Anggaran Penduduk Semasa, Malaysia, 2024** pada hari ini. Laporan ini memaparkan anggaran penduduk di Malaysia bagi tahun 2023 dan 2024. Anggaran penduduk semasa adalah berasaskan Banci Penduduk dan Perumahan Malaysia, 2020. Anggaran penduduk ini menggunakan kaedah komponen kohort yang meliputi kelahiran, kematian dan migrasi.

Ketua Perangkawan Malaysia, Dato' Sri Dr. Mohd Uzir Mahidin berkata, "Jumlah penduduk Malaysia pada 2024 dianggarkan 34.1 juta berbanding 33.4 juta pada 2023 dengan kadar pertumbuhan 1.9 peratus. Penduduk Warganegara meningkat daripada 30.4 juta pada 2023 kepada 30.7 juta pada 2024 dengan kadar pertumbuhan lebih perlahan 0.7 peratus daripada 0.8 peratus pada tahun sebelumnya. Penduduk Bukan warganegara menunjukkan trend yang sama dengan kadar pertumbuhan lebih perlahan sebanyak 13.6 peratus pada 2024 berbanding 17.1 peratus pada 2023".

Ketua Perangkawan mengulas lanjut, Sabah (4.0%), W.P. Kuala Lumpur (3.0%), Selangor (2.1%) dan Johor (1.9%) telah melepasi kadar pertumbuhan nasional. Tiga negeri yang mencatatkan peratusan komposisi penduduk tertinggi pada 2024 ialah Selangor (21.6%), diikuti Johor (12.3%) dan Sabah (11.0%). Sebaliknya, W.P. Labuan dan W.P. Putrajaya mencatatkan peratusan komposisi penduduk terendah iaitu masing-masing 0.3 peratus dan 0.4 peratus.

Komposisi penduduk berumur 0-14 tahun (umur muda) pada 2024 menurun kepada 22.2 peratus berbanding 22.7 peratus pada 2023. Sebaliknya, komposisi penduduk berumur 15-64 tahun (umur bekerja) meningkat daripada 69.9 peratus pada 2023 kepada 70.1 peratus pada 2024. Peratusan penduduk berumur 65 tahun dan lebih (umur tua) meningkat daripada 7.4 peratus kepada 7.7 peratus bagi tempoh yang sama. Umur penengah penduduk Malaysia mencecah 30.9 tahun pada 2024 iaitu meningkat daripada 30.7 tahun berbanding tahun sebelum.

Komposisi penduduk Warganegara pada 2024 menurun daripada 91.1 peratus (2023) kepada 90.0 peratus. Sementara itu, komposisi penduduk Bukan warganegara meningkat kepada 10.0 peratus daripada 8.9 peratus bagi tempoh yang sama, komposisi tertinggi sejak lima tahun yang lalu menghampiri paras semasa pra-pandemik (2017-2018). Peningkatan ini adalah kesan daripada pembukaan semula sempadan negara mulai 1 April 2022. Di samping itu, Program Rekalisasi Tenaga Kerja (RTK) telah dilaksanakan bermula November 2020. Ini diikuti dengan RTK 2.0 yang dilanjutkan sehingga 31 Disember 2023, menyumbang kepada peningkatan bilangan Bukan warganegara di Malaysia.

Bumiputera menyumbang 70.4 peratus daripada 30.7 juta Warganegara pada 2024 (2023: 70.1%). Walau bagaimanapun, komposisi Cina dan India masing-masing menurun kepada 22.4 peratus (2023: 22.6%) dan 6.5 peratus (2023: 6.6%), manakala Lain-lain kekal pada 0.7 peratus.

Pada 2024, bilangan lelaki melebihi perempuan iaitu masing-masing 17.9 juta dan 16.2 juta. Nisbah jantina bagi keseluruhan penduduk adalah 111 lelaki bagi setiap 100 perempuan. Bagi tempoh 2023-2024, nisbah jantina kekal 103 lelaki bagi setiap 100 perempuan untuk Warganegara manakala bagi Bukan warganegara meningkat kepada 228 dari 226 lelaki bagi setiap 100 perempuan. Secara keseluruhan, kesemua negeri di Malaysia mencatatkan bilangan lelaki melebihi perempuan kecuali bagi negeri Perlis (99) dan W.P. Putrajaya (98). Negeri yang mencatatkan nisbah jantina tertinggi adalah W.P. Kuala Lumpur dengan 117 lelaki bagi setiap 100 perempuan diikuti oleh Johor (116), Selangor (115) dan Pahang (114).

W.P. Putrajaya mencatatkan komposisi penduduk muda (0-14 tahun) tertinggi pada 2024 dengan 34.7 peratus. Manakala W.P. Kuala Lumpur mencatatkan komposisi penduduk umur bekerja (15-64 tahun) tertinggi iaitu 75.9 peratus. Pada tahun sebelum ini, sebanyak lapan buah negeri telah mencapai negeri menua iaitu komposisi penduduk umur 65 tahun dan lebih (umur tua) melebihi 7 peratus iaitu Perak, Kedah, Sarawak, Perlis, Pulau Pinang, Selangor, Negeri Sembilan dan Johor. Perak kekal sebagai negeri paling menua dengan 9.9 peratus pada 2024, manakala Kelantan telah muncul sebagai negeri menua yang terbaru dengan 7.0 peratus penduduk berada dalam kumpulan umur ini.


Seiring dengan pertambahan penduduk, kepadatan penduduk Malaysia juga telah meningkat kepada 103 orang (2024) berbanding 101 orang bagi setiap kilometer persegi pada tahun 2023. W.P. Kuala Lumpur merupakan negeri yang paling padat dengan 8,518 orang bagi setiap kilometer persegi, diikuti oleh W.P. Putrajaya (2,440 orang) dan Pulau Pinang (1,746 orang). Sarawak mempunyai kepadatan penduduk terendah dengan 20 orang bagi setiap kilometer persegi, diikuti oleh Pahang (46 orang) dan Sabah (51 orang).

Jabatan Perangkaan Malaysia (DOSM) telah melancarkan OpenDOSM NextGen sebagai medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

DOSM sedang menjalankan Banci Pertanian 2024. Sila layari <https://www.myagricensus.gov.my/> untuk maklumat lanjut. Tema adalah “Banci Pertanian, Kunci Kemajuan Pertanian.”

Kerajaan Malaysia telah mengisytiharkan Hari Statistik Negara (MyStats Day) pada 20 Oktober setiap tahun. Tema sambutan MyStats Day adalah “Statistik Nadi Kehidupan”. DOSM menyambut ulang tahun ke-75 Jubli Intan pada tahun 2024.


Carta 1: Bilangan dan kadar pertumbuhan penduduk tahunan, Malaysia, 2021-2024




Jadual 1: Bilangan dan kadar pertumbuhan tahunan penduduk mengikut 2023 dan 2024^P

Negeri	Bilangan penduduk (juta)		Kadar pertumbuhan tahunan (%)	
	2023	2024 ^P	2023	2024 ^P
Malaysia	33.40	34.06	2.1	1.9
Johor	4.11	4.19	1.9	1.9
Kedah	2.19	2.22	1.2	1.3
Kelantan	1.86	1.89	1.6	1.5
Melaka	1.03	1.05	1.9	1.8
Negeri Sembilan	1.22	1.24	1.4	1.2
Pahang	1.64	1.67	1.8	1.5
Perak	2.54	2.57	1.1	1.1
Perlis	0.29	0.30	1.1	1.3
Pulau Pinang	1.77	1.80	1.8	1.6
Sabah	3.60	3.74	5.2	4.0
Sarawak	2.50	2.52	1.2	0.6
Selangor	7.21	7.36	2.2	2.1
Terengganu	1.21	1.23	2.0	2.0
W.P. Kuala Lumpur	2.01	2.07	2.2	3.0
W.P. Labuan	0.10	0.10	2.2	1.8
W.P. Putrajaya	0.12	0.12	1.5	1.2

Carta 2: Komposisi penduduk Bukan warganegara, Malaysia, 2014-2024^P



Carta 3: Peratusan penduduk mengikut kumpulan umur dan negeri, Malaysia, 2024^p



Jadual 2: Nisbah jantina dan kepadatan penduduk mengikut negeri, Malaysia, 2023 dan 2024^P

Negeri	Nisbah jantina		Kepadatan penduduk (km ²)	
	2023	2024 ^P	2023	2024 ^P
Malaysia	110	111	101	103
Johor	114	116	214	218
Kedah	104	104	230	233
Kelantan	101	101	124	126
Melaka	111	113	586	596
Negeri Sembilan	108	108	183	185
Pahang	113	114	45	46
Perak	109	110	120	122
Perlis	100	99	359	364
Pulau Pinang	105	105	1,719	1,746
Sabah	109	109	49	51
Sarawak	107	107	20	20
Selangor	113	115	908	927
Terengganu	105	106	93	95
W.P. Kuala Lumpur	115	117	8,264	8,518
W.P. Labuan	105	105	1,080	1,100
W.P. Putrajaya	97	98	2,410	2,440

Dikeluarkan oleh:

PEJABAT KETUA PERANGKAWAN
JABATAN PERANGKAAN MALAYSIA
31 JULAI 2024